

15. maj 2014

UPA 2014/109
Per Berthelsen

Kalaallit Nunaata Nunavullu allaffissornikkut politikikkullu suleqatigiinnerulersinnaanerannut periarfissat pillugit kiisalu niueqatigiinnerulersinnaanermut periarfissat pillugit nassuiaasiornissamik Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Doris Jakobsen, Siumut)

Inatsisartunut ilaasortaq Doris Jakobsen, Siumut Kalaallit Nunatta Nunavullu allaffissornikkut politikikkullu suleqatigiinnerulernissaannut periarfissat pillugit kiisalu neiueqatigiinnerulersinnaanerannut periarfissat pillugit Naalakkersuisut nassuiaasiornissaannik peqquneqarnissaannut aalajangiiffigisassatut siunnersuummik saqqummiussivoq.

Siunnersuuteqrtup Nunavumi naggueqatitta, kulturikkut ineriartornikkullu qaninnerusumik suleqatiginissaasa annertusarnissaa pingaaruteqartoq erseqqissarpaa, arlaleriarlunilu angusaqarfiunngitsumik taamatut suleqatigiinnissamik pilersitsiniartoqartaraluartoq nassuerutigalugu.

Taamaammat Doris Jakobsenip Naalakkersuisut kaammattuutininik, iliuusissatut pilersaarutissatut siunnersuutininik, kiisalu suleriaqqinnissamut angusassatut / toqqammavissatut siunniuffisanik imaqartumik nassuiaasiornissaat siunnersuutigaa.

Naalakkersuisut akissuteqaamminni ukioq 2000-imi anguniagaqarnermik oqaaseqaammik, Memorandum of Understandingimik (MoU)-mik taaneqartumik nunarput Nunavullu atsioqatigiissimasut erseqqissaatigaat, taannalu 2013-imi misiligutitut suliniummik kinguneqarpoq, tassani naggueqativut marluk Nunavumeersut Sisimiuni Aatsitassarsiornermik ilinniarfimmi pikkorissaqataatinneqarlutik. Taamatut peqataatitaqarneq iluatsilluartutut nalilerneqarpoq.

Taamattaarlu Naalakkersuisut Siulittaasuata, taamattaq naalakkersuisuni nunanut allanut tunngasunut akisussaasuusup, Kalaallit Nunaat ukioq manna sapaatit akunnerisa 27-ianni Premierministerimit Peter Taptunamit tikeraarneqassasoq, tassanilu anguniagaqarnermik oqaaseqaat siuliani taaneqartoq aamma nangillugu oqaluuserineqassasoq oqaatigineqarpoq, taamaammallu immikkut nassuiaasiornissaq pisariaqanngitsoq Naalakkersuisut naliliipput.

Siunnersuuteqartup nunatta Nunavummi naggueqatitsinnik suleqateqarnermik patajaallisaanissamik oqaaseqarnera Siumup isumaqatigaa. Saqqummiunneqartulli aallaavigalugit massakkuugallartoq pineqartoq pillugu allaffissornikkut isumalluutitik atuisoqassanngikkallartoq, taamaalillunilu suliamut tunngasunik aalajangertoqartinnagu, Premierminister Peter Taptunamik oqaloqatqarnissat taaneqartut utaqqineqartariaqartut Siumut isumaqarpoq.

Taamatut oqaaseqarluta Naalakkersuisut siunnersuutip taparserneqannginnissaanik oqariartuutat taparserparput.